

中國方志叢書·華中地方·第八三九號

據

清·楊詒，徐迪惠等纂修
清道光六年刊本

影印

江 西 省

泰和縣志

(五)

成文出版社有限公司印行

泰和縣志卷三十

吉安府泰和縣知縣

潼關楊 訥原編
上虞徐迪惠訂正

藝文志

志之有藝文末也班書以下僅列書目其文之精要者則摘於紀傳中邑志別編為藝文卷帙較多於志殊失之煩然於奏疏可以觀時事之得失君臣之孚契焉於記傳可以考建置之源委前人之軼事焉至於說經辨義使學者開拓心胸範水模山為騷人沾溉膏馥亦不無小補昔楊少師謂淳熙志所載詩文

多失之泛李穆亦云某氏族譜等序聽琴即事等詩
無所關繫收之何益冉志雖曰酌量存之則仍如塗
塗附矣第相沿既久家有其書一旦芟之不無使人
驚疑是編於冉志藝文悉仍其舊而真贋自有能辨
者惟於續編矜慎別擇尚恐為後人所詆訶也志藝
文

泰和縣志

藝文志

奏疏

修後宮疏

尹昌隆

臣聞言之逆耳者惟聖君乃能聽事之難言者非忠臣不能言然上有仁聖之君斯下有直言之臣方今陛下日月之明天地之量智周萬物而求諫常恐不及憂及困窮而從善有如轉圜是有納言之君又遇可言之時臣又豈敢緘默而不吐露心腹也哉然臣之所欲言者惟願陛下節民力謹嗜慾勤政治務正學而已伏睹陛下初登寶位渙發德音大赦天下首命京官薦舉賢能恩澤所加遠邇無

間羣臣鼓舞於朝萬物條暢於野所謂聖人感人心而天下和平者此其效也夫何即位未幾而土木遽興雖茅茨土階非今日之所宜而峻宇雕牆亦前聖之所戒昔漢文帝欲作露臺尚惜百金之費唐太宗欲營一閣尚慮擾民陛下何不惜千金之費而乃欲撤已成之宮以更新何不憂萬民之力而取材木於遠方乎矧天下之民仰望太平如渴之欲飲饑之待食正宜與之休息也今又重以力役罷弊何堪邇聞內官催木疾如風火郡縣被其折辱小民苦其簞楚公私煩擾所至騷然苟民力旣殫而或因以饑饉則臣恐陛下之赤子無復有如前日之安矣臣之所願節民力者此也經曰三年之喪天下之通喪自天子達於

庶人一也然德教加於百姓刑於四海乃天子之孝也大
甲居憂而處仁遷義故成湯之業賴以不衰高宗諒陰而
恭默思道故中興之功卒能有成是斬焉衰經之中正以
禮導民之日也側聞內官遠自建寧選取侍女使萬姓為
之驚疑衆心為之惶惑若曰天子六宮有常制則大喪尚
未終若曰左右侍御不可無人則中宮尚未冊恐乖風教
之源有阻維新之望況始者終之兆小者大之萌涓涓之
水不先隄防則其流必至於潰川星星之火匪預撲滅則
其勢必至於燎原豈可不防微杜漸而慎終於始乎臣之
所願謹嗜慾者此也自古人君未有不以勤而興逸而廢
書曰自朝至於日中昃不遑暇食此文王之所以勤政也

詩曰鷄既鳴矣朝既盈矣此齊君之所以早朝也我太祖
皇帝在位三十餘年亦未嘗見日而臨百官今或東方既
曙鐘鼓初聞旭日已旦朝儀方肅似非古人庭燎待賢之
意也若曰四方無虞可以從容於殿陛則民情可畏大獄
蠲興誠卧不安席之時也若謂天下乂安可以優游於庶
政則飛蝗蔽天民食寡乏誠戰兢惕厲之日也雖安不忘
危治不忘亂猶恐患生於所忽尚何可一息之或怠乎臣
之所願勤政治者此也仲虺告成湯曰能自得師者王傳
說告高宗曰惟學遜志務時敏是古昔人君未嘗有不學
者也程子有言大率一日之間接賢士大夫之時多親侍
人宮女之時少則自然氣質變化德器成就願陛下於萬

幾之暇進一二正直儒臣以侍左右以備顧問或講求乎
帝王經世之要古今治亂之由或叅究夫天命精微之蘊
人情稼穡之難使涵養既深本心既正則惟精惟一逸樂
無益之事無自而萌芽矣遵義遵道佛老異端之說無由
而眩惑矣所以為聖為賢者寧不在於學乎臣之所願務
正學者此也臣荷國恩備負耳目犬馬思報之誠當不辭
直言之罪謹具所聞以瀆聖聽已往者既不可追而方來
者尤所當謹願陛下審而思之擇善是從追大禹之克勤
師成湯之不吝敦崇節儉與民休息躬行仁義慎始慮終
則太平之基將與天地同其悠久矣

訥菴遺稿

按訥菴遺稿附錄稱建文元年奉詔以監察御史尹

昌隆奏䟽頒示天下時帝視朝稍晏昌隆諫曰高皇
帝雞鳴而起昧爽而朝百官戒懼故能庶績咸舉天
下乂安陛下嗣守大業正宜追繩祖武兢業萬幾未
明求衣日旰忘食常如不及斯為庶幾今乃日晏臨
朝羣臣宿衛疲於伺候曠職廢業上下懈弛臣恐播
之天下傳之四夷非社稷之福也上曰昌隆所言切
中朕過禮部可遍行天下不惟使朕有過人得而知
之且俾天下庶官咸能勤於趨事也明史采入本傳
據此則昌隆所奏止有晏朝一條其措詞亦與此䟽
異附存備考

冉志

地震䟽

尹昌隆

臣聞人事順其序則天地安其常人事失其宜則天地示其變此休咎之明徵古今之通驗也粵自唐虞三代盛時九官之命濟濟相讓故其時陰陽調而風雨時羣生和而萬物育麒麟來遊鳳凰來集凡若此者非天運之適然實人事之所召三代以降小人在位奸臣專命故其時或日月薄蝕或風雨失調或星常晝見或星隕如雨或山川崩竭或地震如雷凡若此者非氣運之使然亦人事之所召也陛下以仁聖之資承大統之業宵衣旰食勵精圖治真猶堯舜禹湯文武之用心也然而嘉祥未集地震先見者夫豈無其故哉誠以變不虛生其生也必有所自妖不妄興其興也必有所由夫天道健而動者陽之義君之象也

地道柔而靜者陰之義臣之象也陽伏而不能舒陰熾而不能抑於是有地震焉今陛下欲陞六部而京師大震是陰盛陽微奸臣專制之有其漸矣太祖皇帝罷中書陞六部酌古準今最為得宜陛下守此體制選賢與能固足以臻至治亦何待於更張乎矧今之任六卿者率皆庸庸之徒素無嘉謀嘉猷可以致君澤民者也陛下又欲陞諸極品奈何不惜名器而濫施爵賞乎且古者明王之稽古建官所以為民也豈徒富貴其臣哉蓋得其人則品級雖卑皆足以致國家於隆平苟非其人則祿秩雖崇亦何關於生民之休戚乎臣願陛下崇陽抑陰以回天地之大變不愆不忘以守祖宗之宏規陛下若謂六卿之陞出自宸衷

未肯中止則臣又有說焉昔酈生勸漢王立六國後高祖稱善促刻印及聞張良之說輟食吐哺促銷印夫刻印銷印在一感悟之間耳高祖何嘗固執哉臣願陛下以銷印為小失以回天變為急務以不變祖宗成憲為可美則天下萬世幸甚

訥菴遺稿

諫易儲疏

蕭 鎡

為遵成憲以安宗社以回天變事臣聞人事順其序則天地安其常人事失其宜則天地示其變此休咎之明徵古今之通驗也粵自三代以來授位之命順序為正故其時陰陽調氣化洽羣生和萬物育三代而下近侍擅權奸臣希寵故其時或日月薄蝕或星隕如雨或地震如雷若此

者非天運之使然實人事之所召也欽惟陛下以仁聖之資紹承大統宵衣旰食勵精圖治有禹湯文武之心然嘉祥未集地震先見天變若此寧無所致哉誠以變不虛生妖不妄興也夫天道健而動者君之義陽之象地道柔而靜者臣之義陰之象陽伏而不能舒陰熾而不能抑於是地震焉今皇太子正位東宮宗社生民之主君之義陽之象也屬廣西土官司都指揮黃斌希恩寵馳奏請上立已子為皇太子奏至命中貴傳示百官寧非陽伏而陰熾乎連日地震如雷舉朝駭愕正所謂人事失宜天地示變者此也矧無易樹子霸者所禁堂堂天朝廢置若是得無啟天下後世之議乎願陛下崇陽抑陰以回天變不愆不

忘率由三代舊章禹之授位於啟無論矣若成湯未立太
丁而外丙仲壬之後仍復太甲太甲即太丁之子也武王
之後成王幼冲周公監國而輔導之周公曾立己子為皇
太子乎伏願陛下毋聽黃筮之言立寢易儲之念庶幾終
殷周之統緒嗣三代之雅化成憲聿遵宗社奠安人事順
序天地安常則天下萬世幸甚

康熙志

治道疏

羅璟

臣伏觀改元之初頒降勅諭云朕以眇躬嗣承祖宗宏業
代天理物負荷維艱爾羣臣有可以匡輔不逮者尚無有
隱羣臣莫不拜手稽首曰聖君如此何忍負之臣荷蒙天
恩深重無能補報用竭狂瞽之思恭陳一得之愚以副陛

下求言之意少助治道之萬一其目有六一曰勵聖志以
隆太平之業二曰樂聖學以極正心之功三曰接羣臣以
通上下之情四曰辨別賢否以公用舍之權五曰優容諫
諍以廣聰明之德六曰崇尚節儉以厚天下之俗敬述先
朝之故實兼陳往代之良規言若迂而實切事若緩而實
急治亂安危有繫於此臣亦知螢爝之微涓滴之細不足
以增日月之盛光江海之巨量伏願陛下寬斧鉞之誅賜
燕閒之暇少垂聖覽或有可采以惠天下則臣幸生於聖
明之世終不與草木同腐朽矣

康熙志

喪禮疏

羅璟

成化四年六月日慈懿皇太后崩逝詔命羣臣集議塋地

臣等雖至愚以為慈懿皇太后昔在先帝之時獨正中宮之位母儀天下壺範六宮梓宮之殯允宜合葬裕陵此天理之當然人心之同然何必更議以啟私疑萬一議者或有依違不當於理誤陛下於有過則何以慰先帝之靈乎竊惟左右或謂慈懿皇太后不當合葬裕陵者不過曰無子而已然實不可以無子論也禮有之曰妻與繼室無所出合附其夫崇正體也其意以為嫡雖無子亦當附葬其夫以正大體以此推之慈懿皇太后雖無子不可不合葬裕陵也宋仁宗一代賢主其嫡母劉后亦陪葬真宗永定陵不聞更在他所則慈懿皇太后亦不宜葬在他所也且先帝臨御之日豈不知慈懿皇太后無子然而眷待之隆

始終如一未嘗厭棄者實以太后雖無子乃當時稟明祖廟詔告天下立以為后名分截然不可亂耳今苟以無子之故改葬他所實非先帝之意也又恐進言者或引先朝胡后故事以為口實臣惟胡后當時以為淨慈仙師以淨慈仙師葬故不得合葬景陵而先帝復位之日尤深自痛悔追復徽號陵寢一以后禮今陛下奉先帝遺詔尊后為慈懿皇太后天下所共聞人心所共戴而非淨慈仙師可比豈可不合葬裕陵伏願陛下酌聖王之禮尊先帝之意斷自宸衷毋惑衆議奉慈懿皇太后梓宮合葬裕陵則陛下孝敬之德垂於無窮矣臣等備員近侍有所見不敢不言况喪禮大事有關人倫風化故不敢畏斧鉞之誅不